


# MUCIMUNYI MUNÈNE

## NÈ WA BUKOLÈ

 Mwoyi wènu awu, mu dindà emu. “Paasàkà wa disànka be” kùdi yònsò wa kunùdi! Edi ndimwè dyà ku matùkù a matàmbe bunènè, mu civùlukilu cyà dibiiikà dyà ku lufù dyà Mukalenge wetù. Ndimwè dyà ku matùkù a matàmbe bunène a mu maalu-malonda ónsò a pa buloba. Ndiibiiikà dyà ku lufù. Nènku tudi ne disànka dyàbúngi bwà kwikala kaaba aka, mu dindà emu, mu ditùkù dinène edi. Ne pa kumòna díbà dipátuka, ne bilóngò bìpátuka mu buloba, byónsò bidi byàkula bwà Paasàkà.

Nènku mpindyewu twinyikààyaaku mitù yètù ànu bwà katanci kakesè cyanààna.

<sup>2</sup> Taatù Nzambi, mu Bwikadi Bwèbè mmutùdi babwelè emu. Ne tudi batekèmene ne neÚtupèeshè, mu dindà emu, ànu kaadibènesha kàà nsàkìdìlù kàà ku Dyulu, ditùlenga dikesè dyà Paasàkà mu misùukà yètù sungasunga; bwà ne, patùumukà mwab’ewu, twamònakù mwà kwamba, bu bàvwà bàfùminà ku Èmawùsè abu ne: “Myoyi yètù kayivwakù yilákuka kapyà munda mwètù, bwà Bwikadi Bwèndè anyi?” Bwalu, tudi tulòmba nùnkù mu Dìna Dyèndè, ne bwà butùmbi Bwèndè. Amen.

<sup>3</sup> Mu mukàndà wà ndekeelu amu, nshapità wa 28 wa Èvànjeeliyò wa Maatàayi Munsantu, ku mvensà wa 7, ndi njinga kubala bwà cyena-bwalu, patùdi tubwela mu mudimu ewu apa.

*Ndàayi lùkàsà, nùkambilè bayiidi bèndè ne yèyè mmubiike ku bafwè; ne, mònaayi, ùdi únúdyànjidila mu Ngalèlà; mwómò amu ki munwàmumònà: mònaayi, nyawù ngánwàmbidi.*

<sup>4</sup> Kùkaadi midimu yàbúngi mitùma naayi bantu ne bisàmbà byà pa buloba ebu. Kàdi kacya kakùtukù kwanji kwikala mudimu mutùmangana naawù wà mushinga munène wùkaadiku mufidiibwe bu wówò ewu to wà ne: “Ndàayi nùkambilè bayiidi Bèndè ne Yèyè mmubiike ku bafwè.” Kì mudimu munène mutùmangana naawù ngwówò awu. Ne mùshindù wùmwèpelè wùvwàku wówò ewu mufwànyine kufidiibwa, mbwalu kùvwa ne cyà kwanji kwikala dicìmuna dinènè, dyàmbedi.

<sup>5</sup> Kùkaadikù bantu mu matùkù ètù aa, ne mu matùkù àkaadi mapite, ne mu maalu-malonda manènè a buloba ebu, mu byalu byàbò, binènè byà mvità; kùkaadikù bacìmunyi banène bààbúngi, bintu binènè byàbúngi bìkaadi byenjiiibwe bwà bukwàbantu.

6 Cileejilu, mûndi ngeela meeji, pângààlu mu dindà emu apu, mubiike pa bwebwebwe, ne nciyi mupetè mpungà wa kulonga byàbûngì to. Bwalu, ncivwa ànu mumanyè ne ncitùpà kaayi, makèèlèlè dilòlò awu, citùvwà mwà kwangata leelù ewu to, pankaci pàà mpaasàtà ne mèmè, mu masangisha. Kàdi mu njila ngenda ndwa, kumvwilabi bwà ngèlè meeji, mu dindà emu ne, ncinyi cidiku cifwànyine kwikala cyà citàmbe bwimpè cindiku mumanyè cyà kwambila cisàmbà Cyèndè, bwà kwangata diyiisha kampànda. Mèmè kwela meeji ku eci ne: “Ndàayi nùkambilè bayiidi Bèndè.” Mpindyewu, *bayiidi Bèndè* m“balondi” Bèndè. *Muyiidi* ng“ewu udi ulonda.” Ki mèmè kwela meeji ku cyena-bwalu eci, cyà ne: *Mucimunyi Munène Nè Wa Bukolè*.

7 Ne mu kwelangana kwà meeji ne mbacimunyi bûngì kaayi batùkaadiku bapetè pa buloba ebu, ne mbintu binène kaayi bikaadibo benzè bwà kutancisha ne kulengeja mùshindù wà nsòmbelu wa muntu. Mvwa ngeela meeji ku Napoléon munène awu, kale mu matùkù èndè awu, mùshindù mwinè wùvwàye kàyi menemene ànu Français to, kàdi ùvwa ne cintu kampànda mu mutù mwèndè. Cyà kumpàla, yèyè—yèyè ùvwa ùpeetula France, kàvwa mumuswèku to. Ùvwa mufùmìne ku bisanga. Kàdi ùvwa ne cingènyingènyi kampànda mu mutù mwèndè, cyà ne, dîngà ditùkù wàdyàkucimuna. Ne cìvwà cyenzè ne ikalè ne bintu ebi mu mutù mwèndè, ùvwa ne cyà kwikala ne cintu kampànda cyà kukwàcilapù mudimu.

8 Bwà muntu yònsò ewu, kumpàla kwà wèwè kwenza mudimu kampànda, bikèngela wikalèku ne kabingilà kampànda, cintu kampànda cyà disungula bwà kwenza, cintu kampànda cyùdi ukwàcilapù mudimu, bwà kiipàcilà kampànda kàà mudimu, cintu kampànda cyà dikwàcilapù mudimu.

9 Ne ànu mutùdi bònsò bamanyè, mu kwangata kwà bwalu-bulonda bwà Hitler . . . anyi, kabùyi bwà Hitler to, kàdi bwà—bwà Napoléon, bwà ne ùvwa ùyiila maalu ku ngondo, ne ku dishintuluka dyà mìtootò. Ùvwa ùkwàta mudimu mùshindù awu, ne mutèkèmene; bwalu musangu kampànda wàkènzàye nàнку, wàkapeta bucimunyi. Ki kubwelayè mu France, ne kulwayè mulwanganyi munène wa mvità. Yèyè kushebeya bantu bààbûngì, bwalu kabàvwa baswè kutwà ku cyèndè to. Ki yèyè kusukula ditungà dyèndè adi dijimà, umùmusha cintu kanà cyònsò cìvwà cibènganganà nendè. Kakùyì mpatà to yèyè wàkabibùtula, bwalu byàkakèngela bwà kuyayè naabì mùshindù awu. Bu yèyè kàyi muyè naabì mùshindù awu to, nùнку kuvw’á kwikala cintu kampànda cimulwisha dîbà dyònsò, ne ndongamu wèndè munène uvwayè nendè mu meeji awu. Nsòmbelu wèndè sungasunga nùнку ùvwa mu njìwù, pa nàнку kukèngelabi bwà yèyè kwikala ne bukalenge bwèndè ànu mu bupwàngànè bwà menemene.

<sup>10</sup> Ndi ngeela meeji mpindyewu ne nudi nundonda mu cyôci eci, cyà Mucimunyi munène úndi ngeela meeji ewu. Bintu byónsò mu Bukalenge Bwèndè bìdi ne cyà kwikala bitwè ku Cyèndè. Cidi ne cyà kwikala mwoyi, musùùkà, ne mubidi, bitwè ku Cyèndè. Kakwèna mwà kwikala cintu nànsha cimwè cibèngangana Nendè to. Cyónsò civwà cibènganganà Nendè, bìvwa bìkèngela kwikala Yè mucyümùshe. Kakùyì mpatà to Yèyè ùdi ne cyà kwenza ne byónsò bìikalè bitwè ku Cyèndè. Ne pàvwà . . .

<sup>11</sup> Napoléon, kwangatayè byà mvità, mbungu yà bingoma, bingoma, bingoma byà bileepa, myelè yà mvità. Ki kupàtukayè e kuya ne meeji àmwèpelè a ne, neàcimunè buloba bujimà. Ki kwambàye kucyenza, pàcivwàye ne bidimu makùmi àsàtù ne bisàtù apu. Pàcivwàye nsongààlùmè apu, ùvwa mukàndiki wa maalà a kapyà. Ne luumù lwèndè lunène alu kumuvwijalù muditu wa ménà wa menemene; ki kamufikabì mu tujilujilu twà mutù, mu mùshindù wà ne wàkafwà mwikàle ne bidimu makùmi àsàtù ne bisàtù, kanwàyì wa maalà a kapyà. Dimanyika dyèndè adi, kupangayè mwà kudikòntonona. Nènku ndi ngeela meeji bwà muntu, mwikàle ku cyôci eci, ne bidimu makùmi àsàtù ne bisàtù, mucimùne buloba kàdi kufwà kanwàyì wa maalà a kapyà, bwà luumù lùvwàye naalù, kàdi kujìmija kiiipààcilà kiinè kàvwàyè ùlwila mvità. Úvwa—úvwa cifwànyikijilu cyà mùshindù, anyi, kacyi cifwànyikijilu to, mùndi mufwànyine kwamba, kàdi úvwa cyamù cyà mudimu cyà dyabùlù. Nènku úteeta bwà kulwà mvità bwà kucimuna buloba, kàdi kupangilayè, ne bidimu makùmi àsàtù ne bisàtù.

<sup>12</sup> Kàdi, kaa, Mulwanganyi munène wa bukolè, wùndi mémè ngamba ewu, mwikàle ne bidimu makùmi àsàtù ne bisàtù, wàkacimuna byónsò bìvwa pa buloba ne mu—mu ifernò. Mwikàle ne bidimu makùmi àsàtù ne bisàtù, Mucimunyi munène ne wa bukolè!

<sup>13</sup> Ndi mvùluka mvità minènè yàkalwìbwà mu cyalu cyà mvità. Tudi bamanyè ne, bwà kujikija bwalu bwà Napoléon, yèyè wàkafika ku ndekeelu wèndè ku Waterloo. Civwa dyànyì dyèsè, ànu àbìdi aa, dyà kumòna ditentula divwàbo benzè dyà dibùtudiibwa dyà màkalù èndè a mvità, ne dyà babàndì bàà pa tubalù ne dyà muntu awu, mùkaavwàbo balààle myandanda mu cyalu cyà mvità amu. Ne màkalù a mvità muungwija mishiki, nkàta yà màkalkù micibula, mu bibandabanda mwònsò amu, mùvwà dileeja dinènè dyà patòòke adi dyenjiibwe.

<sup>14</sup> Kàdi ndipangakana kaayì's wè: dyà kumòna muntu wa bidimu makùmi àsàtù ne bisàtù awu, ne bundù bùdi bushààle mwaba awu mu civùlukilu cyà mvità yèndè minène ne dicimuna dyèndè edi; ne pashiishe kuya ku Yélusàlèmà, bwà kutàngila lukità lwà munda mutupù, bu civùlukilu cyà Mucimunyi munène ne wa bukolè awu.

<sup>15</sup> Mu mùshindù kampànda, kùdikù cintu kampànda mu dicimuna. Twètù ne cintu kampànda citùdi tulwila mvità, kwòkò dîsaamà kampànda mu mubidi wètù, ne biikàle tulwangana pankaci pàà lufù ne mwoyi, ndicimuna kaayi patùdi tumòna ne cyácimunyiibu. Twètù tulwangeena pa ciibidilu cinène kampànda, anyi cintu cinène kampànda cidi citùtuucisha musòdi, pàdibi ne ndekeelu wa byònsò màbèndelà manène àkaadi àpeepa ne twètù bacìcimùne; njiyà kaayi yìdici citùpèesha, munda mwètù, bwalu tudi mwà kwikala mucimunyi díbà adi.

<sup>16</sup> Mpindyewu ndi mvùluka mvità yà ndekeelu, ne mùvwà Hitler mukwàte Varsovie. Ne beena Allemagne kwelabò meeji ne ki dimwè dyà ku macimunyi a matàmbe bunènè àvwàku mafwànyine kwikalakù, bwalu kàpíteenà wabò munène, Hitler Adolphe, wàkuupula bintu pàmwè ne byònsò mu Varsovie amu, muupùle bilamba, ne cilamba cinène aci cyupùke. Bibèjibeji kupàtulabi fòtò minène yà dyupuka dyà cilamba aci. Beena Allemagne kwenzabò ngendu yà mindòlòlooci mu mùsèèsù, ne kwimbabò ngoma ne kwelabò tushibà, ne binunu byà ndèkè kupitabi ku luseke lwèndè, pààkapètàyè bucimunyi bwèndè bunènè bwà kumpàla abu apu. Mubànkàmàne kwàka bu Alexandre le Grand, anyi bu Napoléon, bwà kucimunayè buloba, kàdi wàkoobekela penyi? Mu bundù's. Cyà bushùwà, neyàkenzàyè.

<sup>17</sup> Ndi mwà kuvùluka pààkiibakàbo Njila munène wa Birmanie awu. Kùdi ne cyà kwikala . . . bu bòbò bayè too ne dyàmwàmwà dyà mukùnà awu. Bàmwè bàà ku bansongààlùmè abu mbasòmbe kaaba aka mu dindà emu, pàmwàpa, bàkayà too ne dyàmwàmwà dyà njila munène awu adi. Mudimu mwinè wùvwàku's wè! Mudimu búngi kaayi wàkangatàbi, ne mudimu mwinè búngi wàkenzàbo's wè! Ne búngi bwinè bwà mfrangà yàkatùùkà bwà kwibaka mwinè Njila wa Birmanie awu, miliyò yà ndola's! Nsongààlùmè yàkajimijà myoyi yàbò ayi, mu kwenza kwà nàнку awu! Kàdi ndekeelu wa byònsò, ne paanyimà pàà cikondo, pàkaajikà kilòmèètà wa ndekeelu awu, ne pààkajikà njila awu, mwàkeediibwà mbilà yà bucimunyi ayi kùdi bantu's wè! Bàvwa ne njila uvwabò mwà kwendela too ne dyàmwàmwà dyà mikùnà, bwà kupeta bucimunyi.

<sup>18</sup> Ndi mvùluka njila mukwàbò, uvwa ditùkù kampànda wàkangata mwoyi wà Mukalenge wetù mubènèshìibwe. Kacìvwa ànu njila pa buloba to, kàdi civwa cibeeba cibìikidiibwa ne "cibeeba cyà cijila," wìkala mukoooyike kàyi mwà kupìcilamù to, ànu aba bàdi batwà cimanyinu nkààyaabò. Ànu aba bàdi ku luseke lùdiYe Yèyè abu, ki bààpìcilà mu cibeeba aci.

<sup>19</sup> Mìshindù minènè yà bucimunyi mmipeciibwe. Bààbúngi bàà kutùdi leelù ewu bàdi mwà kuvùluka bìmpè Mvità yà Kumpàla yà Buloba bujimà. Ndi mvùluka pàncìvwà ànu mwànà mutekète,

mvwa mwà kuumvwa tushibà twèdiibwa; ne baabidimè mene, mu budimi, bààkiimanyika tubalù twàbò, ne kupeepa bifulu byàbò. Bààkeela mbilà mikolè. Bààkatuuta mikòbolo. Cìvwa cyenzèke ncinyi? Mvità yìvwa mijikè. Bucìmunyi bwàkapeciibwa. Cìbùcilu cinène citùvwà tulwila mvità ayi aci, ndekeelu wa byònsò twètù kupeta bucìmunyi.

<sup>20</sup> Ndi mvùluka mvità yà ndekeelu yà buloba bujimà eyi. Mvwa musòmbèlè ànu dinsambù dyà mùsèèsù. Nènku pàakabangà tushibà kwediibwa, bantu bààkabwela lubilu mu mbànzà; bakàji ne tulàmbà twàbò twà pa cyàdi twà cikukù, bàtùkòpola, ne bàtùpeepa mu lupeepèlè. Mázaji àpita muulu mu mici. Tushibà tùdila. Tùshinyi tùtembangana mbilu mu misèèsù. Bantu bàpòna ku binù, ne bèèla byanza muulu. Bàtuuta mikòbolo. Bèèla mbilà. Bwà cinyi? Bwalu mvità yìvwa mijikè. Ne babènèshìibwe abu, nsongààlùmè minanga yìvwà dyàmwàmwà dyà mbù ayi, yìvwa ne lùkàsà lwònsò mwà kwangata màzuwà ne kwalukila ku mààbò. Bucìmunyi kaayi's wè! Cìkondo kaayi, ne nditùpika kaayi dyà ne disànka mu mwoyi kanà wònsò's wè! Cyanga kaayi's wè! Dilòlò adi, bantu bònsò bàvwa ànu mu disànka, mu mùshindù wà ne wèwè uvwa mufwànyine kwikala mubwelè mu nzùbu wa kudiila bwà kudyà, kumùpàtuka kùyi mufutè kantu bwà biwàdi abi to, bivwa mwà kwikala ànu bìmpè. Uvwa mufwànyine kwikala mwendèshe kàshinyi kàà muntu mukwàbò mukatwè naakù mu mwaba kampànda, bivwa mwà kwikala ànu bìmpè. Uvwa mufwànyine kwikala mulòmbè cyònsò cyùvwà muswè kulòmba aci, ne pàmwàpa uvwa mufwànyine kwikala mucìpetè. Bwà cinyi? Bucìmunyi bùvwa bupeciibwè. Nsongààlùmè yìvwa yàlukila ku mààbò. Kwàkajika.

<sup>21</sup> Ne ndi mvùluka, mwanèètù wanyi, s'ndyàkabi be mùdi njiyà yà mùshindù awu kayiyikù mwà kushààla díbà dyònsò's. Kàdi, bwà mwena Kilistò, mu dindà emu, bucìmunyi mbumana kupeta. Tungonga twà disànka ki kudilatù eku. Mvità mmijikè, pankàci pàà Nzambi ne muntu. Bucìmunyi mbumana kupeta.

<sup>22</sup> Kumpàlà kwà bucìmunyi bwònsò ebu kupeciibwabù, kùdi ne cyà kwikala mishinga minène mifucìibwe. Kaa, mishinga kaayi's wè! Ne míngà misangu yìdi yà ndòndò mule, ne yìtu yènza bibangu binène byà mpùtá, mpùtá yà mìlengu. Kàdi, bwà kupeta mukùnà, bikèngela twikalè ne cibandabanda. Kumpàlà kwà twètù kupeta muunya, bikèngela twikalè ne mvùla. Kumpàlà kwà twètù kupeta bukènkè, bikèngela twikalè ne bufùku. Kumpàlà kwà twètù kupeta bulelèlè, bivwa bikèngela bìikalè ne mashimi, bwà cyanàànà kwènàku mufwànyine kumanya ne mashimi ncinyi to.

<sup>23</sup> Kàdi bwà kukwàta ku bukòokeshi ne kucìmuna mvità yà mitàmbe bunènè yìkaadìbò bapetèlekù bucìmunyi, Kampànda wàkapàtuka mu Butùmbi, kùkaadi bidimù byàbùngì. Ne Yèyè kààkaDyàngàcila mmwènekèlu wa Mwanjèlo to. Yèyè

kàakalwa bu muntu munène kampànda to. Kàdi Ùvwa ne cyà kujaadikilangana ne kabyèna bikèngela bingoma bileepa byà bàsàlaayi, ne màzaji, ne maabómbè a mushindà bwà kucìmuna mvità to. WàkaDìvwàdika mu didìpwekesha, bu mwànà mukese wa mu dibòko, ne wàkalediibwa mu cidìilù cyà nyama. Kakùvwakù nànsha mene mwaba bwà dilediibwa Dyèndè to, pàakalwàYe apu. Ndi muswè bwà nùtangilè byamu byà mvità bishiilèshiilàngàne, byàkakwàtàYe naabi mudimu.

<sup>24</sup> Mpindyewu, ndelàngànyì yà Adàmà yìvwa yònsò mu bupika. Ki bóbò abu, kabàyi ne ditèkemena, kabàyi ne Nzambi, kabàyi ne mpungà, kabàyi ne luse, kabàyi ne cintu nànsha cimwè cyà cifwànyine kubàkwàcisha to. Beena lukunà banène, bàà mu myaba yà mwinshi yà bajimine, bàvwa babàkàngile mu mîdimà. Kakùvwa njila wa dipàtukila to. Kakùvwa muntu nànsha umwe uvwa mufwànyine kubàkwàcisha to. Cintu nànsha cimwè kacìvwakù cifwànyine kwenjiibwa to. Bìvwa bimwèka ànu bu dijìmina dya kashidi, dya menemene.

<sup>25</sup> Kàdi Cilòbò cyètù, Cyàkatùùlukà cifùmina ku biibi byà mu Butùmbi, wènda udìpwekesha milongo awu!

<sup>26</sup> Bwalu, kakùvwakù muntu pa buloba uvwa mwà kwenza mudimu awu to. Bònsò, mu ngaakwilù wa pa buloba, bàvwa bònsò mu kantu kaluka. Tuvwa, bònsò, “balela mu mpèkaatù, bafwimba mu bubì, balwè pa buloba biikàle twàmba mashimi.” Nènku nànsha umwe wa kutùdi kàvwa mwà kukwàcisha mukwèndè to. Tuvwa tusanganyiiibwa katùyi pabwàsà, bacìmùnyiiibwe, cimvundù cinène eku ne eku, bònsò bakòsòlòkàngàne. Katùvwa mwà kulama mikenji ne mishingà to, pa kumòna butekètè bwàbì ne bikwàbò, katùvwakù mwà kucyènza to. Kàbidì bìvwa bimwèke ànu bu ne bukwàbantu bujìmà bùvwa bujimine.

<sup>27</sup> Ki dìbà adi kulwaYè, kutùùlukaYè. Bwalu: “Yèyè ùvwakù ku cibangidilu,” mùdi Bibe mwambè ne, “Ùvwa Dìyì.” Yèyè ùvwa Logos uvwa mupàtùke mu Nzambi. Ne Logos, ku cibangidilu, ùvwa Dìyì. Nènku Wàkalwa Dìyì. Pashìishe pàakabàndàYe mu ditùkù dya butùmbi dya Paasàkà adi, Yèyè kàakalwa ànu Dìyì to, kàdi Wàkalwa Mwakwidi Munène wa Dìyì Dyèndè Sungasunga. Kaa, cintu kaayi cyà butùmbi’s wè, Mwanèètù Neville! Anjì elàbi meeji! Yèyè kèna ànu Dìyì to, kàdi Ùdi Mwakwidi Munène wa Dìyì Dyèndè Sungasunga. Mmunyì mutùdiku bafwànyine kucyèla mpatà? Mmunyì mutùdiku bafwànyine kuya kùdiYe kàdi kubènga kwitabuuja ne tudi tupeta bitùdi tulòmba? Bwalu, Yèyè ùdi Dìyì ne Mwakwidi wa Dìyì! Logos wàkalwa Dìyì, ne Dìyì divwijiibwe mubidi; ne mubidi wùmweùmwe wùvwa Dìyì awu, mwangàciibwe mu Butùmbi, ne mpindyewu Mwakwidi Munène mwikàle wàkwilangana, Yèyè mwinè, ku Dìyì Dyèndè.

<sup>28</sup> Ki cidì cikèngelà! Ki cyamù cyà mudimu cidì naaci Èkèleeziyà ncyòci aci. Cingoma kaayi’s wè! Kacya kakùtukù

kwanji kwikala nànsha címwè bu Cyôci aci to. Yèyè ùwva Díyì. Ne pàakalwàYe, Wàkalediibwa mu cidìilù cyà nyama. Wàkalwa kukwàta mudimu ne cingoma cyà d-i-n-a-n-g-a, dinanga, bwà kucìmuna maalu a pa buloba; kaciyi ne màzajì a mu cilwilu to, kaciyi ne bingoma byà mwambùuyi ne tutùmbà twà mvità to. Kàdi Wàkalwa mu mùshindù mushiilàngàne. Wàkalwa mu mmwènèkelu wa dinanga. Yèyè ùwa dinanga dyà Nzambì.

<sup>29</sup> Musangu kampànda, pàncìvwà mwànà mutekète, mvwà ngeela meeji ne Kilistò nguvwa munnangè, kàdi Nzambì munkine; bwalu Kilistò wàkamfwila, kàdi Nzambì ùwva mundamine bwalu munda. Kàdi mèmè kulwa kujandula ne Kilistò ki mwoyi mene wà Nzambì. “Nzambì wàkatàmba kunanga bàà pa buloba, mu mùshindù wà ne Wàkafila Mwan’Endè umwèpelè mulela, bwà ewu yònsò udi uMwitabuuja kàfu to, kàdi ìkalè ne Mwoyi wà Cyendèlèlè.”

<sup>30</sup> Mpindyewu Yèyè wàkalwa, dyàmbedi, bwà kucìmuna. Nènku cintu civwà dyàbùlù mutèeke pa buloba aci civwa ndukinu. Nènku Wàkalwa bwà kucìmuna lukinu. Patùdi tucìmuna mu mvità yètù, ne bikwàbò, mu mvità yà pa buloba, bidì misangu yònsò ànu bishiya, dîbà dyònsò, lukinu; bwalu, mvità yà mùshindù awu nyà kùdi mwena lukunà. Kàdi Kilistò wàkalwa ne dinanga, bwà kucìmuna lukinu, bwà kunanga aba bàvwà kabàyi kunanga. Yèyè wàkalwa ne cingoma cishiilàngàne. Ki kudìpwekeshaYè Yèyè mwinè, “muvwijiiibwe ndambù kwìnshì kwà Banjèlo,” bwà kukènga lufù, ne kufila cileejilu. Nènku pàvwàYe pànu pa buloba, Wàkenda munkaci mwà bantu.

<sup>31</sup> Wàkajaadikilangana bingoma Byèndè byà mvità, pààkondopàYe babèedi apu. PààkangatàYe tuumàmpà tukesè tùtaanu ne tuumishipa tukesè tùbidi, kudiiisha bantu binunu bitaanu, Wàkajaadika ne Ùwva ne bukolè kumutù kwà bômbe bwònsò bwà mushindà bùvwàku. Kààkavudija ànu mishipa to, kàdi Wàkavudija mishipa miipika. Kààkavudija ànu blé mu màmpà awu to, kàdi Wàkavudija blé mwosha mu màmpà awu. Cyàkaleeja ne Yèyè ùwva Mucìmunyi munène ne wa bukolè awu! Kààkangata ànu màyi a mu ciinà cyà màyi to, kàdi Wàkaàvwija mvinyò, wòwo màyi awu, a mu ciinà cyà màyi awu. Wàkajaadikilangana ne Ùwva ne Bukolè bwà kucìmuna. Ne Wàkananga, ne cingoma Cyèndè civwa ndinanga. Mpindyewu mònaayi.

<sup>32</sup> Pashiishe pààkenzàYe aci, pààkiimanàYe dینگà ditùkù ku luseke lwà lukità lwà Lazàrò, ne kùvwà muntu, mufwè, ne mujiika kùkaavwà matùkù ànaayi. Nànsha mene bàvwà mwaba awu abu, bàakamba ne: “Mpindyewu yèyè’s ùkaadi ùnunka ne kununka.” Dyùlù dyèndè dikaavwa dibèètèlèlè, misànda yà mu dikòbà yikaavwa yidìkokela munda mwèndè. Ki Yesù kwimana mwaba awu, bu Mucìmunyi wa bukolè, pààkambilàYe Martà ne Màriyà, pààkimanàYe mwab’awu ne: “Ncyènàku mukwambile

ne: ‘Bu wêwè ànu mwà kwitabuuja cyanààna, udi mufwànyine kumòna butùmbi bwà Nzambi’ anyi?’ Ûcivwa ànu ùfuma ku dyamba (pààkambàbo ne: “mwanèètù wa balùme mmufwè” apu, ne bikwàbò), Yéyè ne: “Mémè ndi dibìikà dyà ku lufù ne Mwoyi! Ewu udi ungiitabuuja Mémè, nànsha byòbì ne mmufwè, kàdi neikalè ne mwoyi. Ne ewu yònsò udi ne mwoyi ne ungiitabuuja Mémè, kàadyàkufwàku to. Ncyênàku mufùme ku dikwambila ne Bukolè bwà Cyendelèlè bubènèshìibwe abu, bùdi bùsanganyibwa munda Mwànyi anyi?” Kàakamba anu dīyī cyanààna to, Ûvwa ne bukolè bwà kukùmbaja byònsò byàkambà Ye abi, bwalu Yéyè ùvwa Mucimunyi wa bukolè awu.

<sup>33</sup> Musòmbèle munda Mwèndè, musokòme, mubwikila ne mubidi wà buntu, bu muntu, kàdi ùvwa musòmbèle munda amu kàvwa mukwàbò to ànu Nzambi wa Bukolè bwònsò, Munène ne wa bukolè awu. Yéyè ùvwa mwà kufùkulula. Ûvwa mwà kufùka bintu bipyabipyà. Ûvwa mwà kwakula, ne civwàYe ùlòmba civwà mwà kufidiibwa ànu pa cibànzà. Kàdi, WàkaDìpwekesha, Ûvwa mulamè didìpwekesha. Ûvwa muswè kufila cileejilu. Ûvwa muswè kwikala Mucimunyi wa mùshindù mujaalàme, ne ki civwàYe. Mpindyewu, Wàkajaadika Yéyè mwinè ne ncivwaYe.

<sup>34</sup> Ànu múnkaadi misangu yàbùngì mwambàmbe mu masangisha àànyì, pàmwàpa ncifwànyine kufila bujaadiki mu dindà emu, mu kasùmbù kàa bantu aka, mu dindà dilenga dyà Paasàkà edi. Inàbànzà kampànda, wa mu èkèleeziyà kampànda udi kàyì wìtabuuja diitaba dyà Mashì a Mukalenge Yesù. “Kakùyì dyela dyà Mashì panshì, kakwèna dilekelediibwa dyà mpèkaatù to.” Ùngambila ne Muntu awu ùvwa ànu mupròfetà pàtupù, ànu Muntu mulenga wa dikèma, kàdi mémè mvwa mMuvwija Nzambi. Mémè kwamba ne: “Yéyè’s ùvwa Nzambi. Ûvwa Nzambi.”

Yéyè ne: “Wèwè udi uteeta kuMuvwija mupitèpìte bunène.”

<sup>35</sup> Mémè ne: “Kakwènakù myakù yidì mwà kwamba bunène Bwèndè to!” Mwakulu wà muntu kawùtukù mwanjì kupeta cyakwidi to!

<sup>36</sup> Mvwa ngaakula ne muntu kampànda ditùkù adi, diplomate wa mu Washington DC, ne ùvwa wàmba, ku kaabujaadiki kakesè ku—ku didyà kampànda dyà dindà kutùvwa baswikàkàne, yéyè ne: “Mwanèètù Branham, mémè ntu Luthérien wa kacya bándela. Kadi,” mpàkambàye, “ditùkù adi pàmvwa mubwelè mu ditàbuluja kampànda dyà cyena-kale,” yéyè ne, “mémè kutwà binù ku cyoshelu, ne mvwa muswèku kwenza dilabula ne Nzambi.” Yéyè ne: “Nènku pàmvwà nsanganyibwakù ku binù...” Mpindyewu, ewu n’diplomate wa mu Washington ukàadi mene mukwàte mudimu ne Mfùmu wa ditùnga Cooledge. Nènku mmwenzè ànu “ùbànduluka,” yéyè ne, “mémè kumòna cikèenà-kumòna cyà Yesù.” Yéyè ne: “Ndi mwà kwakula myakulu citèemà mishiilàngàne, bipeepèle.” Yéyè ne: “Kàdi



ncìvwakù mufwànyine kupeta mwakù nànsha wùmwe wà kwamba to, wà mu myakulu yònsò citèemà ayi.” Yèyè ne: “Ki mèmè kwela ànu cyanza muulu cyanààna, ki Yèyè kumpèèsha mupyamùpyà, wà kwakula naawù.” Yèyè ne: “Ndi mfùma ku dimòna Butùmbi bwà mpàlà Wendè.”

37 Inábànza awu kungambilayè, ne: “Mwanèètù Branham, Yesù kàvwa cingà cintu to ànu muntu wetù wa pàtupù ewu, ànu mupròfetà cyanààna.”

Mèmè ne: “Yèyè’s ùvwa Nzambi’s, mwanèètù wa bakàjì.”

38 Yèyè ne: “Wèwè ngudi uMuvwija Nzambi, kadi kî ncìdìYe to.” Ki kwambayè ne: “Mu njila, mutàngile ku lukità lwà Lazàrò, Bible mmwambè ne: ‘Wàkadila mwadi.’”

39 Bushùwà, Yèyè’s nguvwa mwoyi mene wà Nzambi. Wàkakènga ànu mutùdì twètù tukènga emu. Ùvwa mubidi ànu mutùdì twètù mubidi emu. Yèyè ùvwa mwambùle, mu mubidi Wendè, majinga ànu àmwèàmwe ne bikwàbò bitùdì bambùle ebi. Kàdi, bwà kulwa Mulàmbù mupwàngàne, byàkakèngela bwà Ènzè nànkù. Wàkacyenza. Kàdi mèmè kwamba . . .

Yèyè ne: “Wàkadila mwadi, wènda ùpweka mutàngile ku lukità lwà Lazàrò.”

40 Mèmè ne: “Kàdi, kaa, inábànza wa yààyà, aci’s ncyà bushùwà’s. Yèyè ùvwa Muntu, pàvwàYe ùdila mwadi apu. Kàdi pààkiimanàYe mwaba awu, ku luseke lwà lukità alu aku, kùvwà mufwè mupùwe awu mulààdika, kùvwà mubidi mubolè awu mulààdika, mujìngila mu mukààyà, pàakambàYe ne: ‘Umùshaayi dibwe’ apu, kukòkaYe kaamubidi Kèndè kakesè aku, kwamba ne: ‘Lazàrò, pàtukà!’ Ki muntu uvwa mufwè, kùkaavwa matùkù ànaayi awu, kujuukayè e kwimanayè kuulu.”

41 Cìvwa ncinyi aci? Dibola dyàkamanya Mudyènji. Musùùkà wàkamanya Mfùmawù. Nènku Mucimunyi munène ne wa bukòlè awu wàkajaadika mwaba awu ne Yèyè ngudi ne Bukolè pa lufù, ne ifernò, ne lukità.

42 Bushùwà, s’cìdì cìtùpisha mwoyi wètù ne disànka’s! Nudi nwamba bwà kutuutakaja kwà màlòngò, ne dyela dyà mpungi yà màshinyi? S’bìvwa bikèngela bwà bàà pa buloba kwikalabò mu ditwà dyà cyanga mu dindà emu’s, mu mùshindù wà kacya kabìyikù byanji kwenzeka to, tubòbò ne mbilà yà cisàmbà Cyèndè, bwalu leelù ewu nditukù dyà civùlukilu dyàkacimunàYe mwena lukunà wa ndekeelu, ne kutùshìya basùùlùdiibwe ku bupika.

43 Èyowà, Yèyè ùvwa Muntu. Aci ncyà bushùwà. Wàkajaadika ne Ùvwa Muntu, ne Wàkajaadika ne Ùvwa Nzambi.

44 Dilòlò kampànda, pàvwà mbù munène, mutombòke, ukàadi mubiikile binunu byà myoyi. . . Pàmwápa bàmwè bàà ku nwènù baamaamù kaaba aka, mu dindà emu, nsongàalùmè yènù mmifwè mu mbù mutombòke kuntu kwàka, bàdi mwà kwikala



<sup>50</sup> Ne Nzambi wàkaMubàndisha kuulu kule, ne kuMupèèsha Dìna didi kumutù kwà dìnà dyònsò didiku diinyikangana mu Maulu ne pa buloba edi. Dìnà dyònsò mu Dyulu didi diinamina Dìnà dyà “Yesù”! Mwanjèlo yònsò, mukòokeshi yònsò, byònsò bidi biinamina Dìnà dyà “Yesù”! Ludìmi lwònsò nelùMujikùlè, cinù cyònsò necitwe panshi kumpàlà Kwèndè. Ne Yèyè mmubàndishiibwe kuulu kule, mu mùshindù wà ne bikèngela mene bwà Àtangilè panshi bwà kumòna Maulu. Ki Mucimunyi wa bukòlè nyawù! Ki Yèyè wàkacyèna awu! PààkuumukàYe pa buloba, paanyimà, makèlèlèlè dilòòlò tuvwa bapetè, Yèyè ùvwa ne nsapì yà lufù ne yà ifèrnò milembeleja ku luseke Lwèndè, amen, “Kùciinyi to, Ndi Ewu uvwa mufwè, ne udi cyàkàbidì ne mwoyi bwà kashidi ne kashidi. Ne” (*ne mmutwàngaji*) “Ndi ne nsapì yà lufù ne yà ifèrnò, milembeleja *eku*.” Nwènù bàmbambà bwà Mucimunyi’s! “Ne, bwalu Mémè ngàcìmunu, Ndi musebèle ànu cibeeba bwà nwènù kwenzelamù ngendu.”

<sup>51</sup> Bààkabèngela muntu Dyulu, bibeeba bivwa bikànga. Kakùvwa bibeeba to. Kàdi, kùvwa kakùyi bibeeba aku, Yèyè wàkalwa bwà kwenza cibeeba. Kaa, ekèlekèlè! Mulongo wà kumpàlà bàvwa mbaadémons bàà mpatà, wùvwa wùlondà wùvwa ngwà cipùmbishi, wùvwa wùlondà wùvwa ngwà citù; buloba ebu bùvwa bubwikila ne milongo yà makolè a baadémons; pashiishe mabèèdì, màsaamà. Kàdi pààkabangàYe kubànda mu Dyulu! Makèlèlèlè dilòòlò twàMumònu ùpàtuka mu ifèrnò, mwikàle ne nsapì yà lufù ne yà ifèrnò ku luseke Lwèndè. Mu dindà emu tudi tuMubàndisha. Alèluuyàh! PààkabiiikàYe ku lufù, Ùvwa ne. . . Ùvwa mucimùne. Nènku, pàvwàYe wènda ùbànda apu, Yèyè wàkacibula bukòlè bwònsò bwà démon bùdì bukwàte muntu abu. Wàkabànda mu Dyulu, ne wàkapèèsha bantu mapà, mapà a Nyumà Mwimpè. Mucimunyi wa bukòlè! Yèyè mmwimàne nkàâyèndè, mu dindà emu! Nènku, pànkacì Pèndè ne mwena kwitabuuja yònsò, pàdi cibeeba cyà kale cibènèshiibwe cyà cijila ciikalà baakànè mwà kwendelamù. Kakwèna mùshindù wà kupànduka to. Kùdi njila ànu umwèpelè musebela kuumukila mu Butùmbi. Mmushiye Bidyacilu byà makàsà biikàle ne Mashi pàvwàYe ùpicila mu tujila twà makolè a baadémons apu, ne mutwènzèlè cibeeba, kuumukila ku ntwàdijilu too ne ku ndekeelu. Mmusòmbe mu Dyulu, mu dindà emu, bu Mucimunyi wa bukòlè!

<sup>52</sup> Bantu Bèndè kàdi ki kutwàbo cyanga eku. Bòbò abu binunu makùmi, pa buloba bujimà, s’ki kwelabò mbilà yà buciimunyi eku.

<sup>53</sup> Nkàadi mutàngile diya kashàalà dyà ku èkèleeziyà dyà kale dyà mashikà ne bintu byà kwìsùkwìsù edi. Ndi mwà kudifwànyikijila muntu wàmba. . . Nènnùleejè didyùmusha.

<sup>54</sup> Mùneemu emu, Mvità yà Kumpàlà mmyenzè ànu yijika, mukenji wùvwa wùlwa mu njila mùneemu, wùbwela mu bis wa

Greyhound. Bòbò ne: “Mutooyi wónsò ewu ngwà cinyi? Biinè byónsò abi mbyà cinyi?”

55 Ki umwe wa kùdibo kwambayè ne: “Tàngilà kùneeku, cibèjibeji ncyôci eci. Mvità yáfumu ku dijika.” Ne bantu bônso bàdila myadi bèèla mbilà.

56 Kàdi mukàji kampànda kwambayè ne: “Kaa, ekèlekèle, bwà cinyi mbikèngèle bwà kujikayi mùshindù ewu’s?” Yèyè ne: “Bu yikalakù minènge kàbìdì ànu ndambù wa matùkù’s,” yèyè ne, “nùnkù John ne mèmè’s tuv’w’a kwikalakù baneemè.” Yèyè ne: “S’tuv’w’a kwikalakù baneemè.”

57 Kùvwa muntu mulùme mwimàne lwà mu ndekeelu mwà bis; kupyàye mukàji awu, e kwambayè kumwimanshila mu ciibi amu. Kàdi pàakalwà bampùlushi kukwàta muntu mulùme awu, kwambayè ne: “Cíngăcyènzèdì,” yèyè ne, “mukàji awu kàvwakù ne muntu kuntwaku uvwa mumwimàne pa mwoyi to. Kàdi mèmè ndi ne bânà bàà balùmè bàbìdì kuntwaku.” Yèyè ne: “Ncìvwakù mufwànyine kudikànda to.”

58 Kaa, mwanèètù! Mèmè ndi ne taatù dyàmwàmwa. Ndi ne bananga bàanyi dyàmwàmwa. S’ncintu kampànda bwanyi mèmè’s, pàdì Yesù mucimùne. Ndi ne mukàji. Ndi ne mwàna wa mu dibòko. Ndi ne bananga bàanyi. Mucimunyi munène, wa bukolè awu’s wè! Udi mwà kumbiikila mûndì “munsantu mubùnguluki wa mu malaba” anyi “mutèndeledi mukoleshi wa maalu,” cyónso cyùdì muswè aci. Kàdi, pàndì ngeela meeji ne mvità minène mmimanè kujika, musinga mmufuta, bucimunyi mbumànà kupeta. Yesù mmubiike ku bafwè, citampì cyà ndekeelu cyà buumaasiyà Bwendè ne, kwàjikì. Yèyè ùdì ne mwoyi, mu dindà emu, mwikàle ne nsapì yà lufù ne yà ifernò. Ndi ne bananga bàdì bayè dyàmwàmwà dyà mukàlu. Mèmè ndi mu cibebeba cinènè cyà kale eci, ngenda nya bwà kabàmòna. Kanwèdì meeji ne ndi mupâlè to. Kaa, kàdi ndi ne disànka dīngì mùkaadi byónsò bimana kulongolola! Mmudimu mujikija.

Mu kwikala ne mwoyi, Yèyè wàkannanga; mu kufwà, Yèyè wàkansungila;  
Mujiikiibwe, Yèyè wàkangata mpèkaatù yànyi kuya kayishiya kule;  
Mu kubiikà kwà ku lufù, Yèyè wàkambingisha kashidi cyanààna:  
Dīngà ditùkù Nealwe—Éyì nditùkù kaayi dyà butumbi’s wè!

59 Dibàtiiza dyà kale dibènèshìbwe dyà Nyumà Mwimpè edi, bwà kutùlombola mu cibebeba cyà kale cyà cikèmesha eci, kaa, mùshindù mwinè wùdìYe wa butumbi’s wè! Mmunyiku mûndì mufwànyine kuMumvwa bundù’s? Ndi mwimàne ne Pòlò Munsantu, mu dindà emu, ngamba nùnkù ewu: “Ncyèna ne bundù bwà Èvànjeeliyò wa Yesù Kilistò to, bwalu Yèyè ùdì

Bukolè bwà Nzambi bwà lupàndu.” Ùdi Bukolè pa bubèèdi. Ùdi Bukolè pa lufù. Ùdi Bukolè pa lukità.

<sup>60</sup> Mùpostòlò wa muumishe mu disù, wa kale awu pàakafikàye ku ndekeelu kwà lwendu lwèndè, ne kumuumbwilabò lukità kuntwaku, ne lufù lukùngàmàngàne nendè cimònààmèèsù, wàkalùseka buludi mulùtàngile mumpàlà. Kwambayè ne: “Lufù, kalonda kèèbè kàdi penyì? Lukità, bucimunyi bwèbè bùdi penyì?” Dìbà adi yèyè kwela lubilà lwà disaamuna dyà Nzambi ne: “Kàdi twasàkidila kùdi Nzambi Udi utùpèèshila bucimunyi ku Mukalenge wetù Yesù Kilistò!”

<sup>61</sup> Mucimunyi mutàmbe bukolè ukààdikù ne mwoyi, Mucimunyi mutàmbe bukolè ukààdikù mufwè, bwalu Yèyè nguwwa Umwèpelè uvwakù mwà kucimuna; kufwà, ne kucimuna lufù lwólò lwìnè, ne kubànda cyàkàbìdi mu bucimunyi! Wàkajaadika cìvwàYe. Cìvwa nцитampì cyà ndekeelu cyà buumaasiyà Bwèndè.

<sup>62</sup> Nènku mpindyewu, ku mpùùkàpùùka, kwòkò kufwànyine kwikala muntu mu citanda emu mu dindà emu, mwikàle cidimba cyà cìvùmvù cyà èkèleeziyà, kàdi kàyi mumanyè disànkà dyà ne mvità mmijikè. Bantu bàdi bèela mbilà, bantu bàdi bàcyònkomoka, bantu bàdi bàdila myadi! Wèwè udi wamba ne: “Mbwalu kaayi ebu ne bantu aba?” Mbamanyè ne ncintu cijikija. Kwónsò nkujikè! Bushùwà’s! Tudi tutuuta ngoma yà bàsàlaayi. [Mwanèètù Branham ùdi ùtuutakaja byanza—Muf.] Tudi twela mpandalala yà mwadi mukolè, ne Èvànjeeliyò ùdi ùpàtuka. Butùmbi ne Bukolè bwà Nzambi mbimanyiike. Ne mmudimu mujikija, cipungidi cyà ditalala cyàtwibu byàlà; butùmbi kùdi Nzambi’s wè, Kilistò wàtùpu cyàlà ne Mashì Èndè Sungasunga! Mvità yàngata kujika anyèè yàjika. Bucimunyi bwàpèciibù. Mèmè kì ngudikù mubùpetè to; Yèyè ngudi mubùpetè! Mèmè ndi ànu ne disànkà cyanàànà bwà bwalu abu. Èkèlekèle!

<sup>63</sup> Dìbà òvwà yimwè yà ku nsongààlùmè yìvwà yifùma dyàmwàmwà dyà mbù ayi, bàdi bàngambila ne, pàakabwelà màzùwà mu New York, mmenzè ànu ne àbwèdi mu cisabù anyì, mbatàngile kwàka e kumòna Lupingù lwà Budishikaminyi. Ki cintu cyà kumpàla cyùdi umòna, cilònzòmòke mwaba awu. Kujuukabò, bàmwè bàà ku bankòlomù balèmà biimànyine pa ciimanyinu cyà màzùwà apu, bwà kulùmònabò. Nènku pàakabangàbo kumòna Lupingù lwà Budishikaminyi alu, kukùtulabò myadi. Bààkadila myadi. Kupangabò mwà kudikànda. Muntu munène mupàyàme kujuukayè mwaba awu, muntu wa byanza binène bishilè, ùzakalalangana wòmba cikàcìkà. Kabàvwakù mwà kudikànda to. Bwà cinyi? Cìvwa ncimanyinu cyà budishikaminyi. Paanyimà menemene pàà Lupingù lwà Budishikaminyi alu apu, pàvwa . . . pàvwa papa, maman, bananga, munanga, mukàji, mwanà wa mu dibòko, bònso pa buloba ebu bàvwàku ne mushinga mukolè kùdìbo abu, bàvwa bàshàala ànu paanyimà pààlù lwólò apu. Ne

pabwipi menemene ne bôbò kubwelamù, bààkajingulula ne, civwa mbuloba bwà badishikàmine ne cisòmbedi cyà beena dikima. Bushuwa, ncifwànyine kunyungisha masaluka èbè awu, dibèndelà dyà kale àdi dìpeepa. Anji elaaibì meeji ku bwalu abu, nkòlomù awu ne mpùtá yà milengu yà ku mvità ùbwela mu cisabù amu! Cyà bushùwà, civwa ncikondo cilenga be.

64 Kàdi, kaa, mwanèètù, dìmwè dyà ku maadindà aa, Màzuwà a kale a máyì a Sìonà pèèlàwu mpungi, ne mèmè mmòna cimanyinu aci ciimàne mwaba awu, Nkùrusè wa kale wa mabaya kaàyi makoona awu! Pàdi mpeepèlè yìtuuta ku màbèndelà èndè a kalè a makùnzùbile awu, pàdiye wènda ùpìcila mu difwima dyà lufù apu. Bucimunyi kaayìpu's wè! Mòna's, kabyèna bikèmesha to mutùcidi ànu katùyi mwà kudikànda's! Cintu kampàndà ncyenzèke; twàlu beena-mwàbò ne bakwètù. Cintu cyàkùmbanyanganyi.

65 Pàakeelàbo cilamba cinène pankaci pàà Australie wa ku Nord ne—ne—ne—ne wa ku Sud, kuumukila ku Sidney, too ne ku Sidney wa ku Sud. Mùshindù mwinè wàkangatà muntu yònsò. . . Mòna's, bààkaya mu ditungà dijimà, bwà kuteeta bwà kupeta bantu bwà kucyènza. Mudimu awu wùvwa munène bikolè, bwalu bààkamba ne muntu nànsha umwe kàvwa mwà kucyènza to. Ndekeelu wa byònsò, muntu kampànda wa ku Anglettere kwambayè ne: “Mèmè nèngènzè mudimu awu.” Nèku pàakayàye kuntwaku bwà kwenza mudimu awu, wàkateeta mulonda wònsò wà nsàlù wùvwa wùya mu cilamba aci. Luumù lwèndè lùvwa lwediibwe ku diteeta. Kuteetayè bitoci byònsò ne byònsò bìvwa biya panshi. Kutèekayè bantu mu nyungulukilu wèndè, bàà batàmbe bwìmpè bàvwàyekù mwà kupeta abu; kupetayè balongolodi bàà mashingi bàà batàmbe bwìmpè, benji bàà mushindà bàà batàmbe bwìmpè, byònsò byà bitàmbe bwìmpè bìvwàyekù mwà kupeta abi, mu nyungulukilu wèndè. Nèku, ndekeelu wa byònsò, pàakajikà cilambà aci, ki ditùkù kulwadì dìvwàci ne cyà kuteeciibwa.

66 Badyudi kwimanyinabò pa bule ku luseke lùmwè, kwambabò ne: “Kacyàkwimanakù to. Necyùpukè. Mwinshì mwàmwa mùdi lusenga lupite bìngì.”

67 Kàdi kuumbulayè ùya mwinshì, mwinshì, mwinshì, mwinshì menemene. Úvwa ne dyeyemena. Úvwa mumanyè ne byònsò bìvwa biteeciibwe. Ki kwambayè ne: “Nèngènzè lwendu lwà kumpàla lwà kupìcilapù, mèmè mwine.” Nèku pàvwàye wènda ùkosolwela pa cilamba apu, kumpàlà kwà mulombodi wa cimenga, awu paanyimà mùshindù ewu; ne tùwulù tunène, bu tùsambòmbò nànkù awu mu bucyàmà twènda tùya, munkaci mwà kusabuka, tùnyungisha cilamba aci. Muntu munène wàkacyènza awu, wàkaya wènda wèndelapù kumpàlà kwà mulongo wà kadyàmashinda ewu, nùnkù ewu: “Cyòci cyupùke, mèmè nèngùupukè naaci.” Kàdi ùvwa ne dyeyemena.

68 Mùshindù awu ki wàkenzà Mukalenge wetù mubènèshìibwe pààkenzàYe Èkèleeziyà Wendè apu! Ùdi ùteeta mulonda wònsò wà nsàlu, byònsò bìdì bìbwelàMu, bwalu Ùdi ne cyà kwikala musukula ne Mashi! Nènku umwe wa ku badyudi abu ùvwa mwimànyine ku luseke, kwambayè ne: “Musumbà wà bansantu babùnguluki bàà mu malaba wàwa, kabààkusabuka to.” Kàdi dimwè dyà matùkù a butùmbi aa! Mucìmunyi munène, wa bukòlè ewu ùdi wènda kumpalà kwètù leelù, ne bucìmunyi! Cikankakanè, cyènzè cidici ciswè, Yéyè nèikalè. . . Kamwàkwikala kalèmà kàà kalèngù mu cyòci nànsha kàmwè to, mwaba nànsha wùmwe, bwalu Yéyè ùkaadi mwenzè njila, ne mumujikije. Bushùwà!

69 Tudi twela meeji leelù pa ngaakwilù yà bantu, tutèeka meeji ètù pa bintu byà pa buloba. Kàdi lekèlè nkwambilèku cintu kampànda, mwanèètù, nciikadikù ne bundù bwà Èvànjeeliyò to! Kaa, mwanèètù, mèmè's ndi ànu wa cyena-kale, mulediibwe cyàkàbìdì, mulela kùdì Nyumà Mwimpè, ku Nyumà wa Nzambì. Ndi mulediibwe mùshindù awu, ki cyònsò cìndì, ne cyònsò cìndiku muswè kwikala.

70 Musangu kampànda, ànu àbìdì aa, kùvwa nsongàakàjì kampànda uvwa muyè ku cilongelu citùmbùke. Ne yéyè ùvwa nsongàakàjì mutekète, mulenga kwísù. Kàdi pààkaalukilàye kwabò, wàkalwa ne yimwè yà ku mmwènenu yà ku cilongelu cyèndè citùmbùke aci.

71 Nènku pàmwápa, mu dindà emu, bàmwè bàà kunùdì bàvwa ne yimwè yà ku mmwènenu yènu yà pambèlu. Pàmwápa udi mulwè ne mabùkì, mu èkèleeziyà, a mmwènenu yèbè wèwè bùngì cyanaàna. Èè, yùmùshè, ki cintu cìdì citàmbe bwimpè cyà dyenza cìndì mèmè mumanyèku.

72 Pashiishe nsongàakàjì ewu, pààkiimanà kàwulù aku dinsambù adi, ùvwa mulwè ne mwàna wa bakàjì mutekète, umwe wa ku bàà mìshindù yà bàkenyakenya ku mènù abu, nudi bamanyè's, bàà mùshindù wà ci-Elvis Presley abu. Nènku pàvwàye mwimàne mwaba awu, nudi bamanyè's, ku kàwulù aku, mamwéndè ùvwa, pambèlu apu, mukàjì mukùlakàjì mwimàne mwaba awu, ne bibangu, kwísù kwònsò eku; ne tukaaya tukesè, tukòbàme; muvwàle kankanzu kakesè kàà cilàmbà cyà kàzàngulà, ne kàtàmbalà kakesè kàà mu nshingù keela pa makaaya. Ki kànà kakesè kàà bakàjì kàà kàkenyakenya ku mènù kàvwa nendè aku, kànà kàà bakàjì kakwàbò aku, kutàngilakù panshì apu, kwambakù ne: “Èè, wàwa mukàjì mwena dikènga, mukèngeledi wa luse wa kwísù kwà mmwènekèlu mubi wa nkòtòtòtò nganyì?”

73 Èè, nudi bamanyè's, aci kàdi kufwìshaci nsongàakàjì awu bundù bukòlè, kwambayè ne: “Ncyèna mumanyè to,” bwalu ùvwa ànu mwena mankendà a mayè ne mwà nàka, mwikàle

ne mmwènenù yà pa buloba búngì cyaààà mu mutù. Pèndè's ùvwa mmamwèndè mumuledi.

<sup>74</sup> Mmwenzè ànu ùtùùluka ku kàwulù nùnkù, maamù mukesè mukùlàkàjì awu kulwayè lubilu, bwà kumwela citupà. Yèyè ne: “Kaa, munanga wanyì, Nzambi àkubèshè.” Ki kumwelayè nyimà ne kubangayè kuumuka mwaba awu, byenzè bu ne kàvwa mumumanyè to. Ùvwa mudyùmvwè bundù, bwalu mamwèndè ùvwa mubi wa nkòtòtò.

<sup>75</sup> Ki kwenzekabì ne, mwendeshi wa kàwulù awu, ùvwa mumanyè mùvwà bwalu. Kulwayè mwaba awu, ne kutèèkayè byanza pa dikààya dyà nsongàakàjì awu, kumukùdimunayè e kumutàngjija kùdì bàvwà biimàne apu abu, kwambayè ne: “Bundù bwèbè! Bundù bwèbè!” Yèyè ne: “Mémè mvwa mumòne musangu wùwà mamwèbè ewu mulenga mukutàmbe wèwè ewu misangu dikùmi.” Yèyè ne: “Ùvwa . . .Mvwa musòmbèle ku mutumba.” Ki yèyè ne: “Wèwè uvwa mwànà mukesè wa mu dibòko, ne uvwa mu nzùbu wa kuulu mu kalààlù kèbè. Kàdi mamwèbè ùvwa wànyika bilàmbà kumfundu kwà nzùbu.” Ki yèyè ne: “Dyàkàmwè, mudilu kukùtukawù, ne nzùbu mujimà ùvwa mu ndimì yà kapyà. Kàdi pàkalwà mamwèbè mukesè awu lubilu, bu mùvwàye mumanyè ne wèwè uvwa mu nzùbu wa kuulu aku, kuulu kwàka.” Yèyè ne: “Bantu kwelabò mbilà, bàteeta bwà kumukwàta. Kàdi yèyè kukòkà dyàkàmwè civwàye naaci aci, kucyàngatayè, ne kudyèlayè lubilu mu ndimì yà kapyà ayi, too ne mu nzùbu wa kuulu amu; nènku kukòpolayè bilàmbà bivwàye naabì pambidi, e kukujìngilabi wèwè. Nènku ki yèyè ulwàlwa ewu, wàlukidila mu ndimì yà kapyà amu, mukwambùle. Ki kufwàye cipùùkà, mu bulà amu, mwikàle neebè mu mabòko.” Ki yèyè ne: “Kwangatayè civwà cifwànyine kumukùba yèyè aci, kukukùbayè wèwè.” Ki yèyè ne: “Cidì cyènza ne wèwè wikalè mulenga kwisù leelù ewu aci, ki cidì cyènza ne yèyè ìkalè mubi wa nkòtòtò. Kàdi, udi uswà kungambila ne, udi mufwànyine kudyùmvwa bundù bwà bibangu bìdì naabì mamwèbè byàbya anyi?”

Ndi ngeela meeji leelù ewu:

Yesù Yèyè mwambùle nkùrusè nkààyèndè,  
Nànkù bàà pa buloba bujimà bìikalè bènda  
bàkùpa mabòko anyi?  
Kùdì nkùrusè bwà muntu ne muntu,  
Ne kùdì nkùrusè bwànyì mémè.

<sup>76</sup> Piikalàbì ne Yesù wàkangaciibwa bu “Beelèzèbùlà,” kùdì bàà pa buloba ebu, Musekiibwe ne mwelùlùdiibwe, ne mukùdikìibwe ku nkùrusè, muvwijìibwe bundù bwànyì mémè, mémè's ndi ntàmba kwikala wa disànkà bwà kwambula bundù bwà cijila Cyèndè. Èyowà's, mukalenge. Wèwè ubiikila ne: “Munsantu mubùnguluki wa mu malaba!” cyònsò cyùdì muswè kubiikila aci, diyì dyònsò dyùdì muswè kwamba adi. Aci kacyèna



cììmanyikakù to nànsha kakesè. Ndi mèmè ànu ne disànka, mu dindà emu, dyà ne, mu mwoyi wànyì, Kilistò udi mubiike ku lufù awu ùdi ne mwoyi ne ùkòòkesha. Ndi umwe wa ku bantu Bèndè. Ndi mutwìshìibwe ne nwènù pèènù, ki cinùdì.

<sup>77</sup> Dìbà dyetu dyàyi mpindyewu. Tukàadi dìbà mwandamutekète jaajaaja, ditùvwà bambè ne ki ditùvwà mwà kutangalajangana. Masangisha makwàbò neàbangè mu mèbà matwè ku àbìdì, mpindyewu, pa dìbà citèemà ne tusunsa makùmi àsàtù.

Twìnyikàayi mitù, bwà katanci kakesè cyanàànà, mu disambila.

<sup>78</sup> Taatù wa mu Dyulu mubènèshìibwe, tusunsa makùmi ànaayi ne tùtaanu nyewù twàpici, Diyì dyàpàtuku. Myoyi yètù yìdì ne disànka. Cyanga nyewù cimònàngàne; kaciyi cyanga ànu bwà ditùkù dimwèpelè cyanàànà to, kàdi cyanga bwà Cyendèlèlè! Mu Butùmbi, Banjèlo ki kwimbabò misambu eku. Éyi Nzambì, Èkèleeziyà, bucìmunyi, ki kwimbayè eku. Tungonga twà disànka ki kudilatù eku. Misùukà yìvwà musangu kampànda mipiisha ku lufù, bwà kufwàyi ne kuyàye mu lukità lwà dyabùlù; dyabùlù wàcìmunyiibu! Lufù lwàcìmunyiibu. Lukità lwàcìmunyiibu. Bubèèdì bwàcìmunyiibu. Diitabuujà dyà màjimbù dyàcìmunyiibu. Budimù bwàcìmunyiibu. Lukìnu lwàcìmunyiibu. Dibènga-kucyùkà dyà maalu dyàcìmunyiibu. Dyumakana dyàcìmunyiibu. Diditwà dyà mènà dyàcìmunyiibu. Byònsò mbicìmunyiibwe. Kilisto ki Mucìmunyi munène!

Mònaayi! Tàngilàayi Mucìmunyi wa bukòlè,  
(mwàkambà mweidi wa kasàlà)

Mònaayi! NùMutàngilàayi mumwènèke  
patòòke,

Bwalu Yèyè ki Mucìmunyi wa Bukòlè,  
Kacya ànu Wàpanda cilàmbà cikùdika aci  
bipese bìbìdì.

<sup>79</sup> Wàkapanda cilàmbà cikùdika cìvwà cisokòke muntu kùdì Nzambì aci, kàdi mpindyewu Nzambì mmusòmbèle munkacì mwà bantu. Wàkapanda cilàmbà-cikùdika cìvwà cìpangishà dyondopa dyà kùdì Nzambì aci. Wàkapanda cilàmbà-cikùdika cìvwà cìpangishà dibènesha dyà kùdì Nzambì aci. Wàkapanda cilàmbà-cikùdika cìvwà cìpangishà disànkà dyà Nzambì aci. Wàkapanda cilàmbà-cikùdika cìvwà cìpangishà ditalala dyà Nzambì aci. Mpindyewu cibwikilu ncìpanda bipese bìbìdì. Mwikàle ne Mashi Èndè Yèyè mwinè, Yèyè wàkenda bu Mucìmunyi! Mvità yàjikì, Yèyè mmutùjaadikilecì mu dibìikà Dyèndè dyà ku lufù. Nènku mpindyewu Nyumà Mwìmpè ki ntèmu, mutùmìibwe bwà kutùlombola.

<sup>80</sup> Éyi Nzambì wa Cyendèlèlè, kwòkò muntu kaaba aka mu dindà emu, udi ànu mujìmiye dìbà dyèndè cyanàànà, ùbwela upàtuka, ùmuka mu cibeeba, ùdishinda kumpengà, kacya

kà'yikù mwà kwenda mululàme munkaci, pàmwè ne bilòbò binène, bilòbò binènè bikaadi byendèlèndèle munkaci mwà cibeeba abi, tudi tulòmba, mu dindà emu, bwà àKulekèlèèlè byèndè byònsò, ne àpatukè ne àsankilè bucimunyi bunènè bùdì Mukalenge wetù udi mubiike ku lufù mupetè ebu. Enzàku nànkù, Taatù, bwalu tudi tulòmba nùnkù mu Dìnà dyà Kilistò.

<sup>81</sup> Nènku patùcidì ne mitù yètù miinyika apa. Ndi ndikonka, mu cikondo cyà díbà eci, ní nudikù bafwànyine kwela byanza byènù muulu kùdì Kilistò, kwamba ne: “Kilistò, ndi ngaanyisha, ncyàkuKufwàku kàbidì bundù to. Nkààvwa ànu wa ndyùmvwa ndambù bundù cyanàànà.” Nzambì àkubènèshè, inàbànza. Nzambì àkubènèshè, mukalenge. Nzambì àkubènèshè, wèwè. Kaa, ekèlekèlè, byanza mbyela muulu myaba yònsò! “Nkààvwa ndyùmvwa ndambù bundù. Nkààvwa bu udi ne bundù. Kàdi ndi cyà bushùwà mmòna mwaba wànyì mpindyewu. Kabìvwa binkèngela kwikala mwenzè nànkù to. Bìvwa binkèngela kwimana mululàme, mfilà bujaadiki bwànyì! Bìvwa binkèngela kwikala ànu nànkù menemene. Bìvwa binkèngela kwambila bantu bònsò ne: ‘Ndi mulediibwe cyàkàbidì.’ Bìvwa binkèngela kwambila bantu bònsò ne: ‘Ndi mupetè Nyumà Mwimpè.’ Ncyèna ne bundù bwà Èvànjeeliyò to, bwalu Yèyè ùdì Bukolè bwà Nzambì bwà lupàndu. Ndi muswè kwikala mwena Kilistò wa mwoyi mukolè cyà bushùwà. Kì ncìmvwà to. Kàdi, ku dikwàcisha dyà Nzambì, kubangila ànu mu dindà dyà Paasàkà edi, ki cìngiikalà. Ki cìngiikalà.” Kùdikù mukwàbò muntu ùdikù mwà kwela byanza muulu mpindyewu kumpàlà kwà twètù kusambila anyi? Nzambì àkubènèshè, ne wèwè, ne wèwè.

<sup>82</sup> Ekèlekèlè, tàngilàayi mapàngadika's wè! Bòbò bakesè mmakùmi àbidì ne bàtaanu ànyì makùmi àsàtù, basòmbe munkaci mwà kasumbù kakesè kàà bantu aka mu dindà emu, bangàte dipàngadika. Kubangila mu dindà dinène dyà bucimunyi edi, ku ngàsà wa Nzambì, nebàngatè dipàngadika, kwimana kamungùlù ne kubènga kufwà Èvànjeeliyò bundù, bwalu Yèyè ùdì Bukolè bwà Nzambì bwà lupàndu.

<sup>83</sup> Éyì Nzambì, pàdì byanza ebi byediibwe muulu apa, ne mijiki yimba bitùulùbitùulù ne cyonà cikafika too ne kwinshi kwà njila kwàka, bu mutùkaadi buumukè ku lufù bayè ku Mwoyi, bwalu Wèwè udi mwambè ne: “Ewu udi umvwa Méyì Àànyì, ne wítabuujà Ewu udi muNtùme, ùdì ne Mwoyi wà kashidi.” Bààmányì kuumuka ku lufù bàayi ku Mwoyi, bwalu Wèwè wàkalwa lufù bwà bòbò bààmòna mwà kulwa Mwoyi, ku dibiikà Dyèbè dyà ku lufù. Wèwè wàkapwekeshiibwa kwinshì kwà Banjèlo, kulwa panshì bwà kwikala muntu, kupàtuka mu Tèofànì munène awu Dyàmwàmwa, wàkavwijiibwa mubidi ne uvwa ne Mashi, ne kwela Mashi awu panshì, bwà Wèwè kutusebeela bònsò njila wa dipàndukila. Pashiishe kì ng'ànù aci nkààyaaci to, (tudi tucìbala mu Bible), kàdi Wàkaciijaadika, kakuyi kalèma to, ku dibiikà dyà ku bafwè, ne dibiishà dyà

bafwè pa Ûvwà pànu pa buloba; kaciya ànu aci to, kàdi Wàkafila, Udi mucivwijè cijaadiki pàbìdì, muWàkenzelà Abraham amu; mpindyewu, pa kuumusha aci, Wèwè wàkatùma Nyumà Mwìmpè bu ntèmù. Ne tudi ne Bwikadi Bwèndè bubènesha pàmwè neetù, ne munda mwètù, bütüludika, bütülombola mu Bulelèlà bwònsò ne mu Bukènkè.

<sup>84</sup> Tudi tuKwela twasàkidila bwà byanza byàbùngi bìdì byela muulu ebi, mu dindà emu, bàmba ne: “Ndi mpindyewu ngangata Kilistò bu wanyì mèmè.” Éyì Nzambi, bôbò kacya kabàyi banjì kubàtiiiibwa mu màyi to, bwà kuleeja lufù lunène, dijiikiibwa, ne dibìkà dyà ku lufù dyà Mukalenge wabò mubènesha awu, swàku bwà bàalukilè mu disangisha emu mu dindà emu, bàlwa ne bilàmbà byàbò, ne badilongòlòle bwà kubwela mu ciinà cyà màyi àdì makwàte dibwe aa. Enzàku nàнку, Taatù.

<sup>85</sup> Tùbènèshèku. Tùfwilèku luse ku mpèkaatù yètù. NetùKupè butùmbi, munda mwà bikondo bìcivwawwà. Pààjikà mvitá yònsò nkòong, pùmishiiibwà mwìshì wònsò, ne pààjikà disànkà dyònsò, dyà ku mishikù yà pa buloba eyi, kutùdì tuKutùmbishila ne byònsò bitùdì naabi, nebikengele bwà twètù kwikala ne mèyi mapyamàpyà, bantu bapyabàpyà, bwà kuKutùmbishilakù. Swàku bwà dîbà adi twàbwelamù ne disànka. Bwalu tudi tulòmba nùнку mu Dìnà dyà Kilistò. Amen!

<sup>86</sup> Tùjuukilààyaaku kuulu mpindyewu. . . ? . . . Kanùpu mwoyi masangisha to, pa dîbà citèemà ne tusunsa makùmi àsàtù. Alùkilaayi mu mèènù, nùkadye didyà dyènù dyà dindà. Nwàlukilaayi, tudi tutèkemena bwà kwikala neenù mpindyewu. Ne pashìishe dilòòlò edi, nwavùlukaayi. Bikèngela nguùmukè mu mapingaja emu, mwikàle ndonga ne nsambila.

<sup>87</sup> Bwalu ndi nnwàmbila, ne, Kilistò ùdi ne mwoyi, kí mMufwè to. Ne mèmè ndi ngiitabuuja, ne mwoyi wànyì wònsò ne, Yèyè neikalè mu citanda emu mene dilòòlò edi, bwà kuleeja ne Udi ne mwoyi, bwà kwenza bintu bimwèbimwè byàkenzàYe mu dindà dyà Paasàkà wa kumpàla adi ne mu lwendu lwà mu nsòmbelu Wendè mujimà. Byòbì kabìyi nàнку to, dîbà adi mèmè ndi mupròfetà wa mashimi. Ndi ne disànkà dyàbùngi dyà kumanya ne mu dîbà dinènè dyà midimà ditùdì ne mwoyi edi, didì ditèkemena dyònsò, bwà pa kutàngila, dimanè kuya; Kilistò, Lubwebwe lushindàme lutùdiku mwà kwimanyinapù, myaba mikwàbò yònsò nduntekà. Éyo.

<sup>88</sup> Kaamusambu kèètù kakesè, kàà ditangalajangana naakù, kàà ne *Angatà Dìnà Dyà Yesù Wèndè Naadi* aku. Bantu bònsò, cyàpàmwè mpindyewu.

Angatà Dìnà dyà Yesù wèndè naadi,  
Wèwè mwànà wa kanyinganyinga ne dikènga;  
Nedìkupè disànkà ne . . .

89 Kùdimukà ànu cyanààna, ùlabulananganè ku cyanza, wamba ne: “Mukalenge àtumbè,” wambila muntu kampànda udi ku luseke lwèbè awu. (Èè, Mukalenge àbeneshiibwè. . . ? . . .)

Ditèkemena dyà buloba ne disànkà dyà Dyulu;  
Dìna dyà mushinga, Èyì dyà bupòle be!  
Ditèkemena dyà buloba ne disànkà dyà Dyulu.

90 Mpindyewu bantu bònso bìikalè batàngile mu mùshindù ewu? TùMutùmbishaayi ànu cyanààna. Twèlàayi ànu byanza muulu cyanààna, twamba ne: “Twasàkidila, Mukalenge, bwà disùngila dyà musùukà wànyì.” Èyo, bantu bònso!

Twasàkidila, Mukalenge, bwà disùngila dyà  
musùukà wànyì.  
Twasàkidila, Mukalenge, bwà dinsàngaja.  
Twasàkidila, Mukalenge, bwà dimpèèsha,  
Lupàndù Lwèbè lunène lúle tètè ne lwà nciyi  
mfuta kantu.

91 Cintu kaayi cibènèshiibwe’s wè! Nudi baMunangè anyi? Ambàayi ne: “Amen.” Kaa, kùdi. . . Byònso mbikùmbànàngàne mpindyewu, nwènu bânà. Byònso mbijikè, kakùcyèna kàbìdì mvità to, kakùcyèna kàbìdì mvità minène to, cintu nànsha cimwè cidì cikèngela bwà wèwè kwenza; ncimana kwenza. Tudi ànu tucyònkomoka’s! Kaa, ekèlekèle! Tudi bakùmbànàngàne, munda Mwèndè!

. . . mweyèmène,  
Mulamiibwe ne mukùbiibwe ku lubilà lwónso  
lwà didimwija;  
Mweyèmène, mweyèmène,  
Mweyèmène pa mabòkò à kashidi.

Kaa, mùshindù mwinè wùdibi byà bupòle  
bwà kwikala kwendela mu njila wa mwena  
lwendu ewu’s wè,  
Mweyèmène pa Dibòkò dyà kashidi;  
Kaa, mùshindù mwinè wùdi kajila kàtàmba  
kubàlakana ku ditùkù ne ku ditùkù’s wè,  
Mweyèmène pa mabòkò à kashidi.

Mweyèmène, mweyèmène,  
Mulamiibwe ne mukùbiibwe ku lubilà lwónso  
lwà didimwija;  
Mweyèmène, mweyèmène,  
Mweyèmène pa mabòkò à kashidi.

Nwènu bàdi ne mùshindù, ne biikàlekù ne mushwalà abu, wùpàtùlaayi.

. . . kaa, mweyèmène,  
Mulamiibwe ne mukùbiibwe ku lubilà lwónso  
lwà didimwija;

Mweyèmène, mweyèmène,  
Mweyèmène pa mabòkò à kashidi.


Mpindyewu Bible webè!

Mweyèmène, mweyèmène,  
Muklamiibwe ne mukubiibwe ku lubilà lwònsò  
Iwà didimwija;  
Mweyèmène, mweyèmène,  
Mweyèmène pa mabòkò à kashidi.

<sup>92</sup> Ncinyi aci? Mulamiibwe ne mukubiibwe, byònsò mbijikè, mvità mmijikè, citampi cyà ndekeelu ncilamuna, Yèyè wàbàndi. Alèluuyàh!

Mweyèmène, mweyèmène,  
Mulamiibwe ne mukubiibwe ku lubilà lwònsò  
Iwà didimwija;  
Mweyèmène, mweyèmène,  
Mweyèmène pa mabòkò à kashidi.

<sup>93</sup> Mpindyewu twinyikàayaaku mitù yètù bayitàngije ku lupwishi kùvwà Nzambi mutwángacile, kutwàbàndà dîngà ditùkù biikàle tupàtukila mu lupwishi lwà buloba. Bwalu, Mukalenge wetù, mufùmìne ku lupwishi, wàkabwela mu lupwishi, bwà kutùpèèsha Nyumà Wendè udi kàyi ùfwa awu, Yèyè wàkabànda ùmukila mu lupwishi, ne aba bònsò bàdi munda Mwèndè abu, nebàbandè Nèndè dîngà ditùkù, bàye ku myaba yà babènèshiibwe.

<sup>94</sup> Patùdi ne mitù yètù miinyika apa, ndi mmòna ne Mwanèètù Smith ùdi munkaci mwètù, mu dîndà emu, mpaasàtà wa Èglise de Dieu; ùvwa mumbiikile ku tèlefonè makèèlèlè dilòlò awu. Mwanèètù Smith, swàku ùtuulukilè ànu kùneeku. Ndi ndikonka mpindyewu, Mwanèètù Smith ní ùdikù mwà kutùtangalaja mu mwakù wà disambila. Panùdi nulwijakaja bwà kwalukila ku mbànzà yènù, ne bwà kuya kadyà didyà dyènù dyà dîndà apu. Nwàlukilaayi bwà mudimu wà mu Kàlaasà kàa Dyàlumingu, ne mudimu wà dibàtiiza, wùdi wùbanga dyàkàmwè pa dibà citèemà ne tusunsa makùmi àsàtù. Twinyikàayaaku mitù yètù, pàdi Mwanèètù Smith ùtangalajangana mu disambila apa. 

*MUCÌMUNYI MUNÈNE NÈ WA BUKOLÈ* LUA57-0421s

(The Great And Mighty Conqueror)

DILONDANGANA DYÀ MALONGESHA PA DITÀBULUJA DYÀ PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dindà dyà dyàlumingu dyà Paasàkà ku dipàtuka dyà dībà, mu matùkù 21 a ngondo mwinâyì, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)